

**Islam Agama Syumul Yang Pentingkan Konsep Wasatiah
Bernama
6 April, 2012**

PUTRAJAYA, 6 April (Bernama) -- Islam merupakan agama syumul yang mementingkan konsep wasatiah atau keseimbangan yang terbaik dalam setiap jujuk kehidupan umat manusia, kata Menteri di Jabatan Perdana Menteri Datuk Seri Jamil Khir Baharom.

Beliau berkata ia mencakupi semua nilai-nilai yang terkandung dalam akidah, syariah, akhlak, politik dan sosio ekonomi yang saling berkaitan antara satu sama lain.

Katanya dalam menterjemahnya di Malaysia, Perdana Menteri Datuk Seri Najib Tun Razak mengilhamkan Program Transformasi Nasional berpayungkan gagasan 1Malaysia demi memastikan bahawa agenda Islam yang dibawa menjadi teras transformasi ummah yang dinamik dan progresif.

"Perkara ini wajar difahami terutama oleh semua agensi agama sama ada di peringkat persekutuan mahupun negeri; dan hala tuju, perancangan serta tindakan masing-masing perlu diperkasa agar menepati agenda transformasi," katanya semasa membacakan khutbah Jumaat yang bertajuk "Agenda Islam dan Kebajikan Dalam Pembangunan Negara", di Masjid Putra di sini.

Selain Perdana Menteri, turut bersolat jemaah di masjid itu ialah timbalannya Tan Sri Muhyiddin Yassin.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=657507>